

Završetak misije Radne grupe za povratak i rekonstrukciju u Brčkom

Vršilac dužnosti supervizor, Gerhard Sontheim, je danas objavio da će Radna grupa za povratak i rekonstrukciju (RRTF) OHR-a Brčko završiti sa radom 31. decembra 2003. godine. Od 1. januara 2004. godine, nadležnost i odgovornost za povratak i rekonstrukciju će pripasti isključivo organima Brčko Distrikta.

Radna grupa za povratak i rekonstrukciju je osnovana u aprilu 1997. godine, kada je stanje u oblasti povrata imovine u Distriktu bilo obeshrabrujuće, sa više od 10.500 napuštenih objekata i 24.000 raseljenih lica koja su u Distrikt pristigla iz drugih dijelova BiH. Broj uništenih objekata je prelazio 9.800. U to vrijeme, pitanja vezana za povratak rješavala su tri, u velikoj mjeri nefunkcionalna, jednonacionalna ureda za stambena pitanja u Brčkom, Brki i Ravne Brčko.

RRTF je pružio podršku u osnivanju Multietničke stambene komisije u Brčkom u oktobru 1999. godine, kao privremene institucije koja je prethodila osnivanju Pododjela za izbjegla i raseljena lica i stambena pitanja u Vladi Brčko Distrikta u oktobru 2000. godine. Pododjel je prerastao u poseban Odjel Vlade u martu 2001. godine.

Radna grupa za povratak i rekonstrukciju je blisko surađivala sa Odjelom za izbjegla i raseljena lica i stambena pitanja na donošenju Zakona o vraćanju napuštene imovine Brčko Distrikta u aprilu 2001. i na usvajanju nekoliko neophodnih amandmana na pomenuti zakon, u julu 2002.

Svih 10.500 do sada podnijetih imovinskih zahtjeva je riješeno, a potpuna implementacija se planira do kraja

novembra 2003. godine.

V.d. supervizor Sontheim se zahvalio svim organizacijama koje su pružile pomoć u obnovi imovine u Distriktu: Vladi Holandije, Norveške, Japana i Saudijske Arabije, Evropskoj komisiji, SFOR-u, organizaciji USAID i američkom Birou za kretanje stanovništva i izbjeglica. Takođe je izrazio zahvalnost za podršku koju su pružile Vlada RS, Vlada Federacije i Kanton Tuzla.

Sontheim se zahvalio donatorima projekata deminiranja koji su bili osnova bezbjednog povratka i privrednog razvoja, među kojima Vladi Grčke, američkom Uredu za humanitarne programe deminiranja, američkom Ministarstvu poljoprivrede, Evropskoj uniji i Međunarodnom povjereničkom fondu.

Vršilac dužnosti supervizor je podsjetio javnost da ostaje još mnogo toga da se uradi na polju povratka i rekonstrukcije.

Sljedeće bi trebalo da budu prioriteti:

Prvo, program rekonstrukcije oko 1.700 uništenih objekata.

Drugo, nastavak projekta Vlade (u toku) koji se odnosi na popravku 2.300 oštećenih stambenih jedinica (uz ulaganja do 10.000 KM po stambenoj jedinici).

Treće, program popravke i rekonstrukcije oko 184 uništena objekta u društvenoj svojini koji bi trebalo okončati do kraja marta 2004. godine. U ovom momentu, Odjel za izbjegla i raseljena lica i stambena pitanja vrši procjenu stanja u mjesnim zajednicama u Distriktu kako bi utvrdio prioritete u programima rekonstrukcije i popravke. Vlada Distrikta će ustanoviti kriterije za podnošenje zahtjeva i dodijeliti potrebna sredstva.

Četvrto, potrebno je pomoći povratak onih raseljenih lica koje se žele vratiti u Federaciju, a žive u Brčkom. OHR je zadovoljan činjenicom da Distrikt sada učestvuje u radu

Komisije za povratak BiH, kao član sa pravom glasa. Vlada Distrikta i OHR Brčko će se sastati sa Komisijom za povratak BiH u novembru ove godine i razmatraće konkretne projekte za povratak.